

## GALTERIUS

COGNOMENTO SAVEYR MELDENSIS EPISCOPUS.

## NOTITIA HISTORICA.

(Ex *Gallia christiana*, nov. edit., tom. VIII; pag. 1608)

Galterius, dictus *Saveyr*, id est Sapiens, quod A di-posuerat Bernerus prædecessor, at morte præ-ventus adimplere nequiverat, fratribus cœnobii Lacellensis duo altaria donavit in villis Lacella et Vaira iv Kalendas Aprilis 1045, Henrici regis anno xvi, cujus placito pro monachis S. Medardi adversus Robertum Cociacensem subscripsit anno 1047, ejusdemque diplomatibus pro cella sancti Aigulfi cœnobio Sancti Petri Trecensis unienda, et pro canonicis Carnotensibus anno 1048. Eodem anno astitit concilio Silvanectensi, ubi restitutum et confirmatum Sancto Medardo Castellum de Vico. Ab Henrico rege cum Wascelino de Chalinaco missus fuit anno 1050 in Russiam, ut Annam, regis Gerselonis filiam, peteret in uxorem Henrici ipsius post prioris obitum, quod Russiæ rex gratanter accepit. Detectioni corporum sanctorum martyrum Dionysii et sociorum ejus in æde Sandionysiana adfuit anno 1053. Sacro Philippi I regis anno 1059 interfuit, eodemque synodo Romanæ, ubi definita querela monachorum Sancti Albini adversus Vindocinenses, uno ex arbitris Galterio. Subscripsit diplomati Henrici I regis pro restauratione Sancti Martini a Campis anno 1060. Memoratur in præceptis Philippi regis an. 1064 pro monachis Sancti Petri Senonensis, et 1066 pro cœnobio Sancti Nicasii. Interfuit dedicationi ecclesiæ Sancti Martini Campensis, et subscripsit diplomati Philippi regis pro eadem ecclesia anno 1067; eodemque anno litteris ejusdem Villani de la Chapelaude S. Dionysio donatam confirmantis. In concilio Burdegalensi anno 1068 lectæ sunt ejus litteræ quibus testabatur causam de cella Credonensi in synodo Romana secundum Vendocinenses adversus monachos Sancti Albini a Nicolao papa fuisse definitam. Dedicationi Sancti Quintini Bellovacensis astitit anno 1069. Subscripsit instrumento Gaufridi Parisiensis episcopi pro monachis S. Germani a Pratis anno 1070; diplomati Philippi regis anno 1071 in concilio Senonensi confirmantis donatam ecclesiam Sancti Andreæ ab Hugone Trecensi ascetis Cellensibus, eodemque anno præcepto Burchardi, Corbeliensis comitis, pro ecclesia S. Exuperii. Inter concilii Parisiensis, anno 1071 habiti, Patres annumeratus subscripsit diplomati Philippi regis omnia bona Ecclesiæ Compendiensi confirmantis. Concilio Senonensi adfuit anno 1080, eodemque Meldensi, in quo S. Arnulfus creatus est Sussionensis episcopus, amoto Ursione, et Lambertus Morinensis excommunicatus. Terram Morisarti Gauterio abbati et monachis Pontisarensibus circa id tempus approbavit. Subscripsit judicio a Philippo rege lato apud Pisciacum die 6 Januarii anno 1082 in gratiam monachorum Sancti Germani adversus Hugonem militem, cognomento Stavellum. Sigillum quoque apposuit suum chartæ Richeris archiepiscopi Senonensis ecclesiam Sancti Baldi monasterio Sancti Remigii ejusdem urbis concedentis anno xxiii Philippi regis. Galterii obitus notatur xiv Kalendas Novembris anni 1082 in Chronico S. Petri Vivi. In Necrologio Meldensi commemoratur hoc modo: ix Kalendas Novembris obiit *Galterius Saveyr, Meldensis episcopus, qui delit ecclesiæ B. Stephani ecclesiam S. Martini. Fulcoius habet diem 20 Octobris in hocce epitaphio, ubi sepultum dicit in ecclesia Majori, quam de novo construxerat:*

*Hic pius antistes situs est Galterus, honesta  
Cui domus hæc mater sponsoque salva fuit.*

*Quam ne pœniteat te clarum vota secundum  
Rem pretiumque tulit glorificata viro.*

*Cum sit iners, inculta simul, cum nuda venusta,  
Erigit hanc quantum corpore, mente potest.*

*Hanc novat, hanc ornat, cultuque reformat et arte,  
Hanc facit ecclesiam, diruta facta prius.*

*Octobris bis dena dies fuit exitus ejus:  
Mæsta dies, qualis non fuit ante suis.*